

*შპს „ქუთაისის უნივერსიტეტი“  
საერთაშორისო აკადემიური მობილობის პროგრამაში  
მონაწილეობის წესი*

## სარჩევი

მუხლი 1. ზოგადი დებულებები.....	3
მუხლი 2. კონკურსის გამოცხადება .....	3
მუხლი 3. სტუდენტთა შერჩევის პროცედურა .....	4
მუხლი 4. აკადემიური პერსონალის შერჩევის პროცედურა .....	7
მუხლი 5. სტუდენტთა საერთაშორისო მობილობისთვის საჭირო დოკუმენტაციის მომზადება .....	9
მუხლი 6. აკადემიური პერსონალის საერთაშორისო მობილობისთვის საჭირო დოკუმენტაციის მომზადება .....	10

## **მუხლი 1. ზოგადი დებულებები**

1. საერთაშორისო აკადემიური მობილობის პროგრამაში მონაწილეობის წესი ადგენს შპს ქუთაისის უნივერსიტეტის (შემდგომში - უნივერსიტეტის) სტუდენტებისა და აკადემიური პერსონალის მიერ საერთაშორისო მობილობის პროგრამით სარგებლობასთან დაკავშირებულ წესსა და პირობებს. საერთაშორისო მობილობის პროგრამის ხანგრძლივობა და შეთავაზებული სტიპენდიის მოცულობა განისაზღვრება რექტორის ბრძანების საფუძველზე.
2. კონკურსში მონაწილეობა შეუძლიათ ბაკალავრიატის (II - VII სემესტრის), მაგისტრატურის (II, III სემესტრის), ასევე ერთსაფეხურიანი საგანმანათლებლო პროგრამის (III-VI სემესტრის) აქტიური სტატუსის მქონე სტუდენტებს, რომელთა აკადემიური მოსწრების საშუალო შეწონილი ქულა არის მინიმუმ 3.0. აკადემიური პერსონალის შემთხვევაში, საერთაშორისო მობილობის კონკურსში ჩართვის უფლება აქვს ქუთაისის უნივერსიტეტში აკადემიური თანამდებობის მქონე ნებისმიერ პირს.
3. უნივერსიტეტის მიერ დაფინანსებული სტუდენტთა საერთაშორისო მობილობა ხორციელდება სწავლის, ხოლო აკადემიური პერსონალის შემთხვევაში სწავლების ან კვლევის განხორციელების მიზნით.
4. უნივერსიტეტის მიერ დაფინანსებული საერთაშორისო აკადემიური მობილობის პროგრამით სარგებლობის უფლება ერთი საგანმანათლებლო საფეხურის ფარგლებში სტუდენტებს ეძლევათ მხოლოდ ერთხელ. აკადემიური პერსონალის შემთხვევაში, მობილობის პროგრამაში განმეორებითი მონაწილეობა შესაძლებელია უნივერსიტეტის მიერ დაფინანსებული ბოლო განხორციელებული მობილობიდან 1 წლის თავზე.

## **მუხლი 2. კონკურსის გამოცხადება**

1. საერთაშორისო ურთიერთობების სამსახურის ხელმძღვანელის წერილობითი მიმართვის საფუძველზე, უნივერსიტეტის რექტორი გამოსცემს ბრძანებას კონკურსის გამოცხადებასთან დაკავშირებით და ამტკიცებს საკონკურსო კომისიას თითოეული შესარჩევი ეტაპისთვის.
2. რექტორის მიერ გამოცემულ სამართლებრივ აქტში აისახება საერთაშორისო აკადემიური მობილობის პროგრამაში მონაწილეობის მიზნით კონკურსის ჩატარების წესი, ვადა, საკონკურსო პირობები და კონკურსანტთა შერჩევის კრიტერიუმები.
3. კონკურსის პირობები საჯაროდ ქვეყნდება უნივერსიტეტის ვებ გვერდზე და სოციალურ ქსელში. დამატებით, სტუდენტებსა და აკადემიურ პერსონალს ინფორმაცია მიეწოდებათ ელექტრონული ფოსტისა და სატელეფონო შეტყობინების მეშვეობით. საჭიროების შემთხვევაში ტარდება საინფორმაციო შეხვედრები. საერთაშორისო აკადემიური მობილობის პროგრამაში მონაწილეობის მსურველებს ასევე შეუძლიათ კონსულტაციისთვის მიმართონ საერთაშორისო ურთიერთობების სამსახურს.

### მუხლი 3. სტუდენტთა შერჩევის პროცედურა

1. საერთაშორისო აკადემიური მობილობით დაინტერესებული სტუდენტები რეგისტრაციისთვის ავსებენ საერთაშორისო ურთიერთობების სამსახურის მიერ შედგენილ ელექტრონულ სარეგისტრაციო ფორმას.

2. რეგისტრირებულ სტუდენტებს, რომლებიც სრულად აკმაყოფილებენ კონკურსში მონაწილეობის პირობებს, საერთაშორისო ურთიერთობების სამსახური იწვევს პირველ შესარჩევ ეტაპზე, რაც გულისხმობს ინგლისური ენის გამოცდას პირისპირ ან დისტანციური პლატფორმების გამოყენებით.

3. სტუდენტს მოეთხოვება ინგლისურ ენაში B1 ან B2 დონის ცოდნის დადასტურება, *ენების ერთიანი ევროპული სარეკომენდაციო ჩარჩო-დოკუმენტის (CEFR)* შესაბამისად<sup>1</sup>, ოთხ ენობრივ კომპეტენციაში: მოსმენა, წერა, კითხვა, ლაპარაკი.

4. კონკურსის მომდევნო ეტაპზე გადასვლის წინაპირობაა გამოცდით განსაზღვრული მაქსიმალური 100 ქულიდან მინიმუმ 60-ის დაგროვება. დამატებით დაწესებულია 15-ქულიანი ზღვარი, რომელიც სტუდენტმა ოთხივე კომპეტენციაში უნდა გადალახოს. თითოეული სტუდენტისთვის გამოცდა გრძელდება 2 საათისა და 15 წუთის განმავლობაში, ნახევარსაათიანი შესვენების გათვალისწინებით.

მოსმენა (მინ. 15/25 ქულა) – 20 წუთი

წერა (მინ. 15/25) – 30 წუთი

კითხვა (მინ. 15/25 ქულა) – 40 წუთი

შესვენება: 30 წუთი

ლაპარაკი (მინ. 15/25 ქულა) – 15 წუთი ერთ წყვილთან

ჯამური ქულა: მინ. 60/100

5. ინდივიდუალური შეთანხმების და/ან მომსახურების ხელშეკრულების საფუძველზე, ინგლისური ენის საგამოცდო ტესტის შედგენა შეიძლება, დაევალოს ქუთაისის უნივერსიტეტში შესაბამისი კვალიფიკაციის მქონე აკადემიურ/სამეცნიერო/მოწვეულ პერსონალს და/ან გარე ექსპერტს.

6. ინგლისური ენის საგამოცდო ტესტები წინასწარ წარედგინება საერთაშორისო ურთიერთობების სამსახურს, ცალკეული კომპეტენციების შეფასების კრიტერიუმები კი მტკიცდება რექტორის მიერ და უზიარდება საგამოცდო კომისიას.

7. ინგლისური ენის გამოცდას წარმართავს პირველი შესარჩევი ეტაპისთვის რექტორის ბრძანების საფუძველზე წინასწარ დამტკიცებული საკონკურსო კომისია, რომელიც კომპლექტდება შესაბამისი კომპეტენციის მქონე აკადემიური პერსონალისგან. საჭიროების შემთხვევაში, შესაძლოა მოწვეულ იქნას გარე ექსპერტიც.

8. კონკურსის გამჭვირვალობისა და სამართლიანობის პრინციპების დაცვით, ინგლისური ენის საგამოცდო კომისია უნდა შედგებოდეს მინიმუმ ორი წევრისგან.

<sup>1</sup> სტუდენტის მიერ უცხო ენის ცოდნის მოთხოვნილი მინიმალური დონე განისაზღვრება მასპინძელი უნივერსიტეტის შიდა რეგულაციის საფუძველზე. უმრავლეს შემთხვევაში, საკმარისია *ენების ერთიანი ევროპული სარეკომენდაციო ჩარჩო-დოკუმენტის (CEFR)* შესაბამისი B1 დონის ენობრივი კომპეტენციის დადასტურება, თუმცა შესაძლოა, მოთხოვნილ იქნას მინიმუმ B2 დონის ინგლისურის ფლობა.

9. კითხვისა და მოსმენის ნაწილი ავტომატურად მოწმდება წინასწარ განსაზღვრული სწორი პასუხების საფუძველზე, ხოლო წერითი და ზეპირი კომპეტენციის შეფასება ხდება საგამოცდო კომისიის მიერ დაწერილი ქულების საშუალო არითმეტიკულის გამოანგარიშებით.

10. სტუდენტი, რომელიც წარადგენს ინგლისური ენის მოთხოვნილ დონეზე ცოდნის დამადასტურებელ საერთაშორისოდ აღიარებულ სერტიფიკატს, თავისუფლდება ინგლისური ენის გამოცდიდან და ავტომატურად გადადის კონკურსის მომდევნო ეტაპზე. წარმოდგენილი სასერტიფიკატო ქულა CEFR სტანდარტით B1 ან B2 დონის შესაბამისად უნდა იყოს:

ტესტი	B1 დონის შესაბამისი მინ. ქულა
IELTS	4.0
Toefl iBT	42
Toelf PBT	460
Cambridge English Scale Score for Preliminary B1 (formerly known as PET)	140
ტესტი	B2 დონის შესაბამისი მინ. ქულა
IELTS	5.5
Toefl iBT	72
Toelf PBT	543
Cambridge English Scale Score for B2 First (formerly known as FCE)	160

11. საერთაშორისო სტუდენტური მობილობისთვის შესარჩევი კონკურსის მეორე და საბოლოო ეტაპი გულისხმობს ინგლისურენოვან გასაუბრებას, რომელიც წარიმართება პირისპირ ან დისტანციური პლატფორმის გამოყენებით.

12. გასაუბრებაზე ფასდება კონკურსანტთა მოტივაცია აკადემიური, პროფესიული და პიროვნული განვითარების კუთხით, რომელთაგან თითოეულს ენიჭება მაქსიმუმ 3 ქულა შემდეგი კრიტერიუმების შესაბამისად:

### მოტივაცია აკადემიური განვითარების ჭრილში:

0 - კონკურსანტი არ საუბრობს საკუთარ მოტივაციაზე აკადემიური განვითარების ჭრილში ან დემოტივირებულია.

1 - კონკურსანტი ნაკლებად საუბრობს მის მოტივაციაზე აკადემიური განვითარების ჭრილში და/ან არ ესმის საერთაშორისო მობილობის მნიშვნელობა აკადემიური უნარ-ჩვევების შექმნის ან დახვეწის თვალსაზრისით.

2 - კონკურსანტი დამაჯერებლად საუბრობს მის მოტივაციაზე აკადემიური მოსწრების გაუმჯობესების მხრივ, თუმცა აქცენტს მხოლოდ საბაზისო „მყარ უნარებზე“ აკეთებს და ნაკლებად იაზრებს საერთაშორისო მობილობის მნიშვნელობას კრიტიკული თუ შემოქმედებითი აზროვნების განვითარებისთვის.

3 - კონკურსანტს სრულად აქვს გაცნობიერებული საერთაშორისო მობილობის მნიშვნელობა მისი აკადემიური განვითარებისთვის და ამასთან ფიქრობს გამგზავნი უნივერსიტეტის სასწავლო პროცესში ხელახალი ჩაბმის შემდგომ მობილობისას შექმნილი/განვითარებული აკადემიური უნარ-ჩვევების გამოყენებადობაზე.

### მოტივაცია პროფესიული განვითარების ჭრილში:

0 - კონკურსანტი არ საუბრობს საკუთარ მოტივაციაზე პროფესიული განვითარების ჭრილში ან დემოტივირებულია.

1 - კონკურსანტი ნაკლებად საუბრობს მის მოტივაციაზე პროფესიული განვითარების ჭრილში და/ან არ ესმის საერთაშორისო მობილობის მნიშვნელობა მისი მომავალი კარიერისთვის.

2 - კონკურსანტი დამაჯერებლად საუბრობს მის მოტივაციაზე ზოგადი პროფესიული განვითარების თვალსაზრისით, თუმცა არ აქვს კარიერული წინსვლის კონკრეტული ხედვა.

3 - კონკურსანტი სრულად იაზრებს საერთაშორისო მობილობის მნიშვნელობას მისი კარიერული მიზნების მიღწევის გზაზე და ამასთან ფიქრობს სამშობლოში დაბრუნების შემდგომ პროფესიული თვალსაზრისით აღნიშნული გამოცდილების გამოყენებადობაზე.

### მოტივაცია პიროვნული განვითარების ჭრილში:

0 - კონკურსანტი არ საუბრობს საკუთარ მოტივაციაზე პიროვნული განვითარების ჭრილში ან დემოტივირებულია.

1 - პიროვნულ განვითარებაზე საუბრისას, კონკურსანტი ზოგადი ტერმინებით შემოიფარგლება, არ ავლენს თვითრეფლექსიის უნარს და საერთაშორისო მობილობის გამოცდილებას საკუთარი მე-ს ჩამოყალიბების პროცესთან ვერ აკავშირებს.

2- კონკურსანტი დამაჯერებლად საუბრობს მის მოტივაციაზე პიროვნული განვითარების ჭრილში, თუმცა აქცენტს მხოლოდ პოზიტიურ გამოცდილებაზე აკეთებს და სრულად ვერ იაზრებს საერთაშორისო მობილობასთან დაკავშირებული ცხოვრებისეული გამოწვევების არსს

3 - კონკურსანტი ავლენს ფსიქოლოგიურ მზადყოფნას გაუმკლავდეს და მოერგოს საერთაშორისო მობილობასთან დაკავშირებულ გამოწვევებს და მოტივირებულია თითოეული მათგანი „რბილ უნარებად“ გარდაქმნას (მედეგობა, დროის მენეჯმენტის უნარი, ინტერპერსონალური უნარები, ინოვაცია და კრეატიულობა, პირადი ჰიგიენა, ა.შ.)

13. მეორე შესარჩევი ეტაპისთვის საერთაშორისო ურთიერთობების სამსახურის მიერ წარდგენილი და რექტორის მიერ წინასწარი ბრძანების საფუძველზე დამტკიცებული გასაუბრების კომისია შედგება სამი წევრისგან. საბოლოო შეფასება (მაქს. 9 ქულა) გამოითვლება კომისიის წევრთა მიერ დაწერილი ქულების საშუალო არითმეტიკულის გამოთვლითა და მათი დაჯამებით.

კომისიაში აუცილებელი წესით წარმოდგენილნი არიან საერთაშორისო ურთიერთობების სამსახურის თანამშრომელი და პროგრამის ხელმძღვანელი/თანახელმძღვანელი. მესამე წევრი კი შეიძლება იყოს სხვა ნებისმიერი ადმინისტრაციული ან აკადემიური თანამდებობის მქონე პირი.

14. სხვადასხვა საგანმანათლებლო პროგრამის სტუდენტები ერთმანეთთან კონკურენციაში არ შედიან. გამარჯვებულად ცხადდებიან პროგრამების მიხედვით ყველაზე მაღალი შეფასების მქონე კონკურსანტები, რომელთა რაოდენობაც რექტორის ბრძანების საფუძველზე წინასწარ განსაზღვრულ საკონკურსო პირობებზეა დამოკიდებული.

#### მუხლი 4. აკადემიური პერსონალის შერჩევის პროცედურა

1. საერთაშორისო მობილობით დაინტერესებული აკადემიური პერსონალი ავსებს საერთაშორისო ურთიერთობების სამსახურის მიერ შედგენილ ელექტრონულ სააპლიკაციო ფორმას და ტვირთავს შემდეგ დოკუმენტებს:

- Curriculum Vitae ან რეზიუმე
- პუბლიკაციების სია (ასეთის არსებობის შემთხვევაში)
- დიპლომების ასლები
- ინგლისური ენის B2/C1 დონეზე ფლობის მოწმობა<sup>2,3</sup>

წარმოდგენილი სასერტიფიკატო ქულა CEFR სტანდარტით B2 ან C1 დონის შესაბამისად უნდა იყოს:

ტესტი	B2 დონის შესაბამისი მინ. ქულა
IELTS	5.5
Toefl iBT	72
Toefl PBT	543
Cambridge English Scale Score for B2 First (formerly known as FCE)	160

<sup>2</sup> აკადემიური პერსონალის მიერ უცხო ენის ცოდნის მოთხოვნილი მინიმალური დონე განისაზღვრება მასპინძელი უნივერსიტეტის შიდა რეგულაციის საფუძველზე. უმრავლეს შემთხვევაში, საკმარისია ენების ერთიანი ევროპული სარეგომენდაციო ჩარჩო-დოკუმენტის (CEFR) შესაბამისი B1 დონის ენობრივი კომპეტენციის დადასტურება, თუმცა შესაძლოა, მოთხოვნილ იქნას მინიმუმ B2 დონის ინგლისურის ფლობა.

<sup>3</sup> მისაღება, როგორც ბოლო 2 წლის განმავლობაში მინიჭებული საერთაშორისო სერტიფიკატი, ისე ინგლისურენოვანი სამაგისტრო ან/და სადოქტორო ხარისხის ქონის დამადასტურებელი დოკუმენტი.

ტესტი	C1 დონის შესაბამისი მინ. ქულა
IELTS	7.0
Toefl iBT	95
Toefl PBT	627
Cambridge English Scale Score for C1 Advanced (formerly known as CAE)	180

2. სრულყოფილად შევსებული სააპლიკაციო ფორმის ავტორებს საერთაშორისო ურთიერთობების სამსახური იწვევს ინგლისურენოვანი ლექციის/პრეზენტაციის ჩასატარებლად რექტორის მიერ წინასწარ დამტკიცებული კომისიის წინაშე.

3. სწავლების მიზნით მობილობის კანდიდატების შესარჩევი კონკურსი საჩვენებელი ლექციის წაყვანას, ხოლო კვლევითი ვიზიტის განხორციელების მსურველთათვის საკვლევო პროექტის პრეზენტაციას გულისხმობს.

4. საკონკურსო კომისიის წევრები არიან: შესაბამისი ფაკულტეტის დეკანი, შესაბამისი პროგრამის ხელმძღვანელი/თანახელმძღვანელი და საერთაშორისო ურთიერთობების სამსახურის წარმომადგენელი.

5. საჩვენებელი ლექციის შეფასება ხდება შემდეგი კრიტერიუმების მიხედვით:

- სასწავლო კურსის თემატიკის ცოდნა
- თანმიმდევრული ლაპარაკი
- აუდიტორიასთან კონტაქტი
- გამოყენებული სწავლების მეთოდები
- შეკითხვებზე პასუხის გაცემის უნარი

თითოეული კრიტერიუმი ფასდება 3-ბალიან სკალაზე, სადაც 3 მაქსიმალური, ხოლო 1 მინიმალური შეფასებაა (3 - კარგი; 2 - დამაკმაყოფილებელი; 1-ცუდი). სასურველია თითოეულ ქულას ახლდეს მოკლე განმარტება/აღწერა.

6. საკვლევო პროექტის პრეზენტაცია ფასდება შემდეგი კრიტერიუმების მიხედვით:

- საკითხის აქტუალობა და მნიშვნელობა
- პროექტის შესაბამისობა უნივერსიტეტის სტრატეგიასთან/კვლევით პრიორიტეტებთან
- კვლევის სიახლე და ინოვაციურობა
- მოსალოდნელი შედეგების სამეცნიერო ღირებულება და/ან კვლევის შედეგების პოტენციური პრაქტიკული გამოყენებადობა
- პროექტით დასახული კვლევის განხორციელებადობა (ავტორის კვალიფიკაციისა და დასახული მიზნების გათვალისწინებით)



თითოეული კრიტერიუმი ფასდება 3-ბალიან სკალაზე, სადაც 3 მაქსიმალური, ხოლო 1 მინიმალური შეფასებაა (3 - კარგი; 2 - დამაკმაყოფილებელი; 1-ცუდი). სასურველია თითოეულ ქულას ახლდეს მოკლე განმარტება/აღწერა.

7. საჩვენებელი ლექცია/ საკვლევო პროექტის პრეზენტაცია ფასდება კომისიის სამივე წევრის მიერ კონკურსანტისთვის მინიჭებული ქულების საშუალო არითმეტიკულის დაანგარიშების გზით და შეადგენს მაქსიმუმ 15 ქულას.

8. სხვადასხვა საგანმანათლებლო პროგრამის ლექტორები ერთმანეთთან კონკურენციაში არ შედიან. გამარჯვებულად ცხადდებიან პროგრამების მიხედვით ყველაზე მაღალი შეფასების მქონე კონკურსანტები, რომელთა რაოდენობაც რექტორის ბრძანების საფუძველზე წინასწარ განსაზღვრულ საკონკურსო პირობებზეა დამოკიდებული.

### **მუხლი 5. სტუდენტთა საერთაშორისო მობილობისთვის საჭირო დოკუმენტაციის მომზადება**

1. კონკურსის გამარჯვებულების გამოვლენის შემდეგ, საერთაშორისო ურთიერთობების სამსახური შერჩეულ სტუდენტებს უზიარებს მასპინძელი უნივერსიტეტის ინგლისურენოვანი სასწავლო კურსების კატალოგს.

2. საერთაშორისო ურთიერთობების სამსახურის კოორდინაციის ქვეშ, შესაბამისი პროგრამის ხელმძღვანელი, სასწავლო პროცესის მართვის მენეჯერის ტექნიკური მხარდაჭერით ადგენს თავსებადობას მასპინძელი უნივერსიტეტის კურსებსა და სტუდენტის მიერ ადგილობრივად გასავლელ სასწავლო კურსებს შორის.

3. სტუდენტის ინტერესების გათვალისწინებით, საერთაშორისო ურთიერთობების სამსახური ამუშავებს სასწავლო ხელშეკრულების პირველად ვერსიას, რომელიც სტუდენტს საბოლოო გადაწყვეტილების მისაღებად ეგზავნება. დამატებით, საერთაშორისო ურთიერთობების სამსახური სტუდენტებს აძლევს რეკომენდაციას, კონსულტაცია გაიარონ პარტნიორი უნივერსიტეტის საერთაშორისო მობილობის კოორდინატორთან და მათ აღნიშნული კონტაქტის დამყარებაში ეხმარება.

4. კონსულტაციების შედეგად სტუდენტი იღებს საბოლოო გადაწყვეტილებას და მასთან შეთანხმებით ქუთაისის უნივერსიტეტში ფორმდება სასწავლო ხელშეკრულების შიდა დოკუმენტი, რომელშიც ჩამოთვლილია როგორც პარტნიორ უნივერსიტეტში გასავლელი სასწავლო კურსები, ისე ადგილობრივად მათი შესატყვისი სასწავლო კურსები, შესაბამისი კრედიტების მითითებით. აღნიშნულ დოკუმენტს ხელს აწერს პროგრამის ხელმძღვანელი, დარგის ექსპერტი და ხარისხის უზრუნველყოფის სამსახურის უფროსი/წარმომადგენელი, რითაც ქუთაისის უნივერსიტეტი პასუხისმგებლობას იღებს სტუდენტის დაბრუნების შემდგომ მის მიერ პარტნიორ უნივერსიტეტში დაგროვილი კრედიტების აღიარებაზე, დოკუმენტში გაწერილი სქემის შესაბამისად.

5. პარტნიორ უნივერსიტეტში ყოფნის პერიოდში სასწავლო ხელშეკრულებაში აუცილებლობით გამოწვეული ნებისმიერი ტიპის ცვლილების განსახორციელებლად სტუდენტი უკავშირდება ქუთაისის უნივერსიტეტის საერთაშორისო ურთიერთობების სამსახურს და აწვდის ინფორმაციას

ცვლილების განხორციელების შესახებ, რომელიც უნდა დასტურდებოდეს შესაბამისი მტკიცებულებით. გადაწყვეტილება მიიღება სტუდენტის ინტერესების გათვალისწინებით.

6. სასწავლო კურსების შერჩევა-აღიარების საკითხის მოწესრიგების მიღმა, საერთაშორისო ურთიერთობების სამსახური პასუხისმგებელია პარტნიორი უნივერსიტეტის მიერ სხვა მოთხოვნილი დოკუმენტაციის მომზადებასა და დროულად მიწოდებაზე, ისევე როგორც სტუდენტის მასპინძელ უნივერსიტეტში გამგზავრებამდე მის სრულ ინფორმაციულ უზრუნველყოფაზე.

7. სტუდენტი თავის მხრივ ვალდებულია საერთაშორისო ურთიერთობების სამსახურს გაუზიაროს საერთაშორისო მობილობისთვის საჭირო ყველა პირადი დოკუმენტის ასლი და მითითებების მიხედვით, შეავსოს მასპინძელი უნივერსიტეტის მიერ მოთხოვნილი სააპლიკაციო ფორმა/ფორმები.

8. პარტნიორ უნივერსიტეტში სწავლის პერიოდში, სტუდენტს ქუთაისის უნივერსიტეტში უნარჩუნდება აქტიური სტატუსი და იგი იხდის აღიარებული კრედიტების საფასურს.

9. დაბრუნების შემდგომ, სტუდენტს მოეთხოვება ხარისხის უზრუნველყოფის სამსახურის მიერ სპეციალურად შემუშავებული კითხვარის შევსება, რომლის მიზანია საერთაშორისო აკადემიური მობილობის ეფექტიანობის შეფასება

#### **მუხლი 6. აკად. პერსონალის საერთაშორისო მობილობისთვის საჭირო დოკუმენტაციის მომზადება**

1. საერთაშორისო მობილობის პროგრამაში მონაწილეობისთვის შერჩეულ აკადემიურ პერსონალს უფორმდება სწავლების/კვლევის ხელშეკრულების გარე და შიდა დოკუმენტები. პირველი მათგანი მასპინძელ უნივერსიტეტში ჩასატარებელი სალექციო საათებისა თუ კვლევის გეგმის განსაზღვრაზე, მეორე კი გაზიარების მიზნით, ქუთაისის უნივერსიტეტში მობილობის შემდგომი აქტივობების დაგეგმვაზე.

2. ხელშეკრულებების ხელმოწერით, კონკურსის წესით შერჩეული აკადემიური პერსონალი პასუხისმგებლობას იღებს გამგზავნ და მასპინძელ უნივერსიტეტებში ნაკისრი ვალდებულებების კეთილსინდისირებად შესრულებაზე.

3. საერთაშორისო ურთიერთობების სამსახური პასუხისმგებელია აკადემიური პერსონალის მობილობასთან დაკავშირებული დოკუმენტაციის მომზადებასა და პარტნიორი უნივერსიტეტისთვის დროულად მიწოდებაზე.

4. აკადემიური პერსონალი თავის მხრივ ვალდებულია საერთაშორისო ურთიერთობების სამსახურს გაუზიაროს საერთაშორისო მობილობისთვის საჭირო ყველა პირადი დოკუმენტის ასლი და მითითებების მიხედვით, შეავსოს მასპინძელი უნივერსიტეტის მიერ მოთხოვნილი სააპლიკაციო ფორმა/ფორმები.

5. დაბრუნების შემდგომ, აკადემიურ პერსონალს მოეთხოვება ხარისხის უზრუნველყოფის სამსახურის მიერ სპეციალურად შემუშავებული კითხვარის შევსება, რომლის მიზანია საერთაშორისო აკადემიური მობილობის ეფექტიანობის შეფასება